

## ILANGANI 6

# Hakugiktittiyuq Maligaqmiq

## Naunaittiaqtuq, kiuttaaqniq unalu iliuraiyuq ayurhautipkaininnginnik

Tahapkuat piumayanginnik aadlangurninngit uqaqtaungittut Ilanganit 1-5 uumani titiqqami, kihimi akhuurutauyumik qanuriliurutingit umannga nutaanguqtiqhimayuuq maligaq.

### **Katimayiingit Nunavut Ilinniaqtuliriyiitkunnut Katimayiit Nunallaani (CNDEA)**

Tamna CNDEA piliurhimayuuq 2008mi kiudjutigamik apirikmata amihunik atayumik pipkaidjutiyukhat DEA-tkunnut ilihainiqmut timiqutigiyanginnut. Tamna CNDEA piqaqtuq qaffiuyunik havaangit munariyanginniklu tuniyauyuq ukununngam tamna nutaaq Maligaqmi. Kitu naunaittuq taimaa CNDEA havakhimmaaqniaqtuq havaktut nutaanguqhimayumi maligaq. Kihimi, una havaktut hungiutiyukhaugaluat unalu ihumagiffaaqluaqlugu nakuutqiamik tautukuuyaariamikni hakugikninngit timiqutigiyayuumut ikayuutauniaqtut pipkaidjutininngit ilihainiqmut tuniqhaininnga. Una imaatut ittuq qanuriliurutingit kiuttaaqniq naunaittiaqhimayukhaq pittaarumi unalu ihuaqhaqhimayut ihuarhigiami uqaqatigiikniq unalu ikayuqniqlu. Aallamut, hivullitigiyakhat umannga Katimayiingit ihuaqhaqtauyukhat naunairiami kiklinga ikayuutinga DEA-tkunnut, unalu ihumagilluaqtauyumik, nakuuyumik pilaqutauyut timiqutigiyanginnut tamainnit. Kiklingat umannga CNDEA-tkut ihuarhaffaaqhimayut havaktut unalu piyutlu havaangit naunaiqtauniaqtut akhuraaluk qanuqtut ihumagiyamiknik piyangit inuknut uqaqatigiiktillugit. Naunaiyaffaarlugut havaangit munariyanginniklu umannga CNDEA piliurniaqtaat ihuaqhaqhimayut unalu pilluaqtaunahuaqtuq pilaqutauyut tuniqhaininnganut ilihainiqmut Katimayiinginnut.

### **Naunaittiaqtuq Ilihainiqmut Maligaqmi**

Tukiliurutingit, unalu ihuaqninga, atuqtauninnga, malirutingit unalu aadjikutauyut ihuittumik ulapiqutauyut tamna nutaaq Maligaqmi, ihuaqhaqtauniaqtut ihuaqhaqtauyarumi. Ilangit ihariyanginnik titiraffaaqhimaniaqtut titiraffaaqatauyukhaugumi tunigiami naunaittiaqtuq ayurnaittuqlu aturiami, piiyarlugillu naluyanginnik.

## **Havaguiqtitauniq/Havaktiffaaqtitauniqluuniit atan'nguyanik ukuatlu atan'nguyap tugliata**

Piumayanginnik aadlangurninngit ukununnga havaguiqtitauniq havaktiffaaqtitauniqluuniit atan'nguyanut ukunanullu atan'nguyap tugliata ittukhaugaluaq kikliqarluni tallimanik ukiunik havaklutik, unaungitkaluaqluni nutaaq pingahut-ukiunik havaklutik. Havaktitauniq atan'nguyanik tuglianginniklu pingittut naunaitkutaripkainiqmik, kihimi pingittut ihuaqtunik talvannga piyaxhanginnik, uumannga pingitluni ittuq ilangani 112(3) umannga *Maligaq*, piqarniaqtutlu kikliqarluni tallimanik ukiunik havaktitauluni.

## **Pinahuarutingit ihuaqtunik unalu ukpiriyayunik maliktakhat**

Tamna nutaaq maligaq naunaittarutauniaqtaa pinahuarutingit ihuaqtunik unalu ukpiriyayuniklu maliktakhat atuqtakhaungittut atuliqtitaunahuaqtumi ilihapkaiyuq ihuaqtuq aturvikviuyumit qanuqtut ihumagiyamiknik. Taimaittut pinahuarutingit tuniniaqtuq utuqqanik qanuqtut ihumainnaqtainniinnaq. Iliharvikmi havaktut unalu DEA-ngit pittailimaittut atuliqtitaunahuaqtumik ilihapkaigiamiluuniit ihuaqtuq aturvikviuyumik qanuqtut ihumagiyamiknik hilataani pinahuarutingit ihuaqtunik aturvikviuyumikluuniit maliktakhaq, hapkuatlu kihimi kikliqangittut aadlanut iliharviknut, talvannga iliharvikmi ilihaidjut, nunannga ilihaidjutinut, nunagiyamikni unalu nunallaani ilihaidjut piliuqtauyuq DEA-tkunnit, uqaqatigiikhutik ikayuqtauyut innait Inuksiutilirijiitnit, sikuuqtunik katimapkaitillugit quviahuutipkainiqmut unalu pitillugu Angayuqqaanguyut-Sikuuqtittiit Katimayiyuyut katimayut. Naunaittariami, una tuniqhaininnga pingittuq ukununnga pinahuarutingit hulilukaarutilluuniit ihumaalutilgit ukununnga ilihagtittiut uumunngaluuniit ayuirhaniaq Inuit Qaujimaajatuqangit.